



Masyarakat perlu tahu adab dan etika di media sosial kerana kesalahan seperti mengugut, menghina dan sebar berita palsu bakal menerima hukuman. - Foto hiasan

Kebebasan di media sosial lunturkan nilai murni masyarakat

Dr Hasnah Hussiin bhrencana@bh.com.my Muka 10

Rabu, 6 April 2022 | 10:29am

Pepatah Melayu menyebut 'kerana pulut santan binasa, kerana mulut badan binasa'. Ini membawa maksud percakapan kasar, tidak elok atau tidak menjaga tutur kata akhirnya memberi padah kepada penuturnya.

la bermaksud betapa pentingnya penerapan nilai murni seperti adab dan etika dalam kehidupan masyarakat hari ini yang seperti semakin dilupakan dan ditinggalkan.

Soalnya, sejauh manakah ketinggian adab dan etika masyarakat ketika ini? Tambahan pula media sosial bebas menyebarkan perlakuan, perbuatan dan tutur kata individu tertentu yang disifatkan tidak beradab, menggambarkan nipisnya adab masyarakat pada hari ini.

Perkara ini tidak harus dibiarkan kerana menjadi hasrat kerajaan membentuk Keluarga Malaysia penyayang mempunyai sifat tolong-menolong, berkasih-sayang, saling menghormati, bantu-membantu, bertolak ansur, bekerjasama, bertegur sapa dan bersimpati.

Tetapi realiti perlu dihadapi negara dan masyarakat hari ini adalah kurang mengamalkan adab dan etika murni dalam kehidupan seharian.

Disebabkan kurang adab dan etika hidup bermasyarakat, wujud penghinaan terhadap ajaran agama dan bangsa lain.

Kepelbagaian dimiliki hari ini adalah untuk mendidik masyarakat saling menghormati dan bertolak ansur, bukan untuk bermusuh.

Hilang adab dan etika pada diri seorang menyebabkan ada individu menghina pemimpin sama ada dengan kata-kata atau perbuatan.

Media sosial dijadikan gelanggang menghina pemimpin dengan cara tidak sepatutnya. Rasa hormat kepada pemimpin negara semakin luntur disebabkan keberanian luar biasa sehingga membutakan mata negara ini memiliki undangundang dan peraturan.

Di sini juga dapat dikaitkan sikap individu tertentu tidak lagi menghormati Perlembagaan dan undang-undang negara seperti lupa dengan konsep 'di mana bumi dipijak, di situ langit dijunjung'. Akibatnya, mereka berani menghina negara sendiri di media sosial, termasuk apa saja menjadi lambang negara.

Buktinya mereka memijak dan menterbalikkan Jalur Gemilang. Inilah padahnya bila adab dan etika sebagai rakyat Malaysia tidak dipraktikkan lagi.

Laungan bagi membentuk masyarakat penyayang dilihat sepi oleh individu dan kelompok tertentu. Apabila adab dan etika hidup berkeluarga semakin luntur, anak tidak lagi menghormati orang lebih tua.

Kurang pemahaman mengenai adab dan etika sebagai seorang murid atau pelajar, maka kita dapat saksikan di sana sini murid sekolah atau pelajar di institusi pengajian tinggi (IPT) tidak menghormati guru serta pensyarah.

Nilai murni sebagai murid kepada guru semakin pudar. Zaman kini, guru dikeji jika menegur, ibu bapa akan datang mempersoalkan jika anak mereka dimarahi.

Kini, murid merasa mereka lebih bijak, manakala guru pula merasakan mereka dipijak. Walaupun perkara ini membabitkan segelintir individu saja, budaya tidak beradab dalam kalangan pelajar semakin berkembang.

Perkara sama juga berlaku di IPT walaupun dilihat tidak membimbangkan, tetapi generasi yang dididik ini bakal mewarisi pemerintahan negara pada masa akan datang.

Bukan itu saja, tenaga pengajar juga perlu memiliki adab dan etika yang baik ketika menyampaikan ilmu kepada pelajar kerana mereka adalah contoh kepada anak didiknya.

Semua pihak perlu saling menghormati serta memahami kedudukan dan status masing-masing.

Penuntut ilmu perlu mengamalkan adab dan etika sebagai pelajar, manakala pengajar sama ada guru atau pensyarah patut mengamalkan etika profesional sebagai pengajar.

Kewujudan media sosial meruntuhkan lagi adab dan nilai murni masyarakat apabila ia menjadi tempat individu melontarkan apa juga perasaan dan pendirian mereka tanpa batas.

Tidak salah menggunakan media sosial untuk kebaikan semua pihak, tetapi segala perbuatan dan percakapan di media sosial perlu berhati-hati kerana ada mata memerhati dan telinga mendengar.

Justeru, masyarakat hari ini perlu tahu adab dan etika apabila berada di media sosial kerana sesiapa melakukan kesalahan seperti mengugut, menghina, memfitnah, menyebarkan berita palsu dan sebagainya ada hukuman menanti.

Suruhanjaya Komunikasi dan Multimedia (SKMM) serta Polis Diraja Malaysia (PDRM) tidak akan berkompromi dan sedia mengambil tindakan tegas terhadap individu atau pihak tertentu sengaja menggugat keharmonian, kestabilan dan keselamatan negara.

Jelas sekali, rakyat wajib menjaga adab dan etika kerana ia selari dengan Rukun Negara iaitu 'Kesopanan dan Kesusilaan' serta amalan agama.

Penulis adalah Pensyarah Kanan Pusat Sains Kemanusiaan Universiti Malaysia Pahang (UMP)